

Pupuk budaya insan prihatin



Program ini dapat membuka mata setiap ahli betapa pentingnya nilai kemanusiaan sejagat sejajar dengan dakwah yang disampaikan oleh kami dalam bentuk muzik nasyid"

Bali: Kumpulan Nasyid Nahwan Nur, Universiti Putra Malaysia (UPM) mengadakan program Kembara Bakti Tabanan Bali, Indonesia bagi membantu masyarakat Islam di Panti Asuhan Yayasan Al-Islam Hidayatullah di sini, baru-baru ini.

Penyelaras Kelab, Adidi Tamin, berkata program khidmat masyarakat yang berkonsepkan 'Bakti Budaya' itu bertujuan memberikan bantuan secara sukarela daripada ahli kumpulan serta membuat persembahan kepada anak-anak di panti asuhan itu.

"Program ini sejajar dengan hasrat universiti untuk memupuk setiap warganya menjadi insan yang prihatin terhadap kepentingan ilmu pengetahuan serta mengaplikasikan ilmu untuk membantu meningkatkan sahsiah dan budaya Malaysia kepada masyarakat luar," katanya.

Sementara itu, wakil Panti Asuhan Yayasan Al-Islam Hidayatullah, Didik Khoirudin Zuhri, berkata panti itu yang terletak di tengah bandar Denpasar, menempatkan hampir 900 penghuni yang terdiri daripada anak-anak yatim dan golongan miskin.

"Sumbangan daripada Nahwan Nur secara

langsung membantu kami di panti asuhan dan berharap jalinan hubungan ini akan diteruskan bagi memperkukuhkan lagi perhubungan serta perkongsian ilmu daripada pelajar UPM kepada anak-anak di sini," katanya.

Nilai kemanusiaan

Nahwan Nur yang mewakili UPM menyampai-kan bantuan berbentuk kewangan, kitab Yassin serta peralatan ibadah kepada wakil panti asuhan hasil daripada sumbangan warga UPM, alumni dan orang perseorangan.

Pengarah program, Muhammad Aliff Rusli yang juga Presiden Kelab Nasyid Nahwan Nur, berkata program itu memberi banyak manfaat kepada ahli kumpulan dalam meningkatkan lagi tahap kesedaran sivik terutama kepada golongan memerlukan.

"Program lima hari ini juga adalah platform terbaik untuk warga UPM merasai sendiri pengalaman berada di tempat orang.

Selain memupuk nilai murni dalam membantu mereka yang memerlukan, di samping turut menanamkan sifat kesedaran dalam diri dan bersyukur diberikan nikmat dalam kehidupan," katanya.



Kumpulan Nasyid Nahwan Nur, UPM mengadakan program Kembara Bakti Tabanan Bali, Indonesia, baru-baru ini.